

Kenese 1:28 – O se Faamanuia poo se Faamalaia?

Upu Tomua

E muamua lava ona faatalofa atu i le pa'ia o lenei mafutaga. I le susu o lau Susuga i le ta'ita'i, le susu o Susuga i toeaia, faapea le nofo a faafeagaiga. Talofa lava!

O le 'autu o lenei pepa ma lenei su'esu'ega Kenese 1:28 "O se faamanuia poo se faamalaia?" o loo afifi ai se masalosologa o o'u nofo ma a'u. E faatatau i le folafolaga a le Atua ina ua mae'a ona faia le tagata.

“Ua faamanuia foi e le Atua ia te i laua, ma ua fetalai atu le Atua ia te i laua, Ia fanafanau ia, ma ia uluola ma ia tumu ai le lalolagi, ia faatoilalo i ai, ma ia pule i i'a i le sami, ma manu felelei, atoa ma mea ola uma e fetolofi i le eleele.”

O le faauigaina masani lava o nei upu, o le faamanuia lea a le Atua i le tagata. O le faamanuia ina ia uluola ma fanafanau, o le pule foi e pulea ai mea ola uma oi le foafoaga, faapea le malosia e faato'ilalo ai le lalolagi. Foliga mai o le faamanuia a le Atua o le pule faitalia lea mo le tagata e faaogaina ai le foafoaga i soo se ala e manao iai.

Ia ua manino lava le faauigaina masani o le faamanuia a le Alii. Ae ua mafua lava ona lagā se manatu masalosalo i le faauigaina o ia upu, ona o mafuaaga nei;

1. O le upu Eperu o le בָּרַךְ (*bārak*) o faaogaina e le tusitala o Kenese e faamatala ai le folafolaga a le Atua i le tagata. O lona uiga lata mai o le "to'otuli." E faatatau i le to'otuli e tatalo, to'otuli e faa'u, to'otuli e faato'ese, pe to'otuli foi e faataunuu se sala. O lenei upu e uiga lua, ma o loo faaogaina i le Feagaiga Tuai e faamatala ai le faamanuia, faapea foi le faamalaia a le Atua ma le faamalaia a tagata. Mo ni nai faataitaiga, taga'i i le Kenese 9:1 o loo faamatala ai le faamanuia a le Atua ia Noa ma ona atalii. Faapea le 1 Tupu 8: 14 o loo faamatala ai le faamanuia a le tupu o Solomona i ona tagata. Ao le 1 Tupu 21:10 ma le 13 o loo faamatala ai le faifai i le Atua faapei ona tu'uā'ia ai Napota e A'apo. O le Iopu 2:5 o loo faamatalaina ai le faifai a le fanau a Iopu i le Atua, faapei ona masalomia ai e le toeaia ma le fuaiupu e 11, o faatatau i le mana'o o Satani ina ia faifai Iopu i le Alii.
2. O le isi mafua'aga o lo'u fesiligia o le folafolaga a le Atua, o le matuiā lea o upu Eperu ia e faaogaina e le tusitala o Kenese, e faamatala ai manuia mo le tagata mai le Alii.
 - a. Muamua o le upu lea o le כָּבַשׁ (*kābash*) o loo faaliliuina i le Tusi Paia Samoa o le "faato'ilalo." O lenei upu e fai si matuiā o ona uiga. O faaogaina i le tusi O Eseta 7:8 e faamatalaina ai faigā-'aiga fai faamalosia. Ae o loo faaogaina i le tusi o Numera 32:22, 29; Iosua 18:1; 1 Nofoaiga a Tupu 22:18; 2 Nofoaiga a Tupu 28:10; Neemia 5:5 ma le Ieremia 34:11, 16 e faamatalaina ai le olopalaina o se fili, ma le faamalosia o tagata e fai ma pologa. O se faamanuia la poo se faamalaia?
 - b. O le isi upu o le רָדָה (*rādā*) lea e faaliliuina i le Tusi Paia Samoa i le upu "pule." O lenei upu Eperu o lona uiga lata mai o le "o'omi i lalo" poo le "soli i vae." O loo faaogaina i le tusi a Ioelu 3:13 e faamatala ai le soliina o vine i le gaosiaina o uaina, faapea le tusi a Isaia 14:2 e faamatala ai le puleaina e Isaraelu o ona fili ma le Isaia 14:6 e faatatau i le faapologaina o Isaraelu i pulega a tupu faapaupau. O se faamanuia la poo se faamalaia?

O nei va'aiga ua manino mai ai, e uiga lua le faamanuia a le Atua. E mafai ona vaai iai o se faamanuia, e mafai foi ona faitauina o se faamalaia. E manino la le vaai o se faamalaia pe a tatou taga'i i le fuaiupu ua 'autū iai le pepa, mai le va'aiga faa-si'osi'omaga.

Kenese 1:28 ma le Si'osi'omaga

O le fuaiupu ua fai ma 'autū o le suesuega, o le isi lea fuaiupu o le Tusi Paia ua tu'uā'ia e le au su'esu'e ma i latou o taulamua i le faasaoina o le siosiomaga, ua mafua ai ona so'ona faaaoga lē tatauina e tagata le si'osi'omaga. O lo latou manatu, ua avea le faamanuia a le Atua i le tagata, ma ala o le faamalaiaina o le si'osi'omaga. Ma e manino lea va'aiga, pe a tatou taga'i i vaega ta'itasi o le faamanuia a le Atua.

1. Ia Fanafanau ma Uluola ia Tumu ai le Lalolagi

I le vaai faasi'osi'omaga, o le faamanuia mo tagata ina ia faato'ateleina ma faatupula'ia, ua mafua ai le faafitauli o le toatele nauā o tagata (overpopulation). O le faatupula'ia o tagata, ua o'o ai i le tulaga ua lē gafatia e le lalolagi ma ona puna'oa ona fagagaina ma tausaiaina le faitau aofa'i o le lalolagi. O le isi lea mafuaaga o ōge ma faama'i o a'afia ai le lalolagi.

Ma o loo atagia foi le faafitauli lea i le faamanuia a le Atua, pe a taga'i toto'a i le upu Eperu lea o le מַלְעָה (*mālē'*) lea o loo faaliliuina e le Tusi Paia Samoa o le "tumu." O le upu lea e uiga lua. E faaaogaina e faamatalaina ai se faamanuiaga. Faapei o le tumu faale-agaga, tumu faale-mafaufau ma le tumu i tamao'aiga. E faapei o le faaaogaina i le tusi a Ioelu, o loo faatatau ai le tumu lea i tamao'aiga o Isaraelu ua faapei o uaina ua tutumu ai tuugauaina. Ae e faaogaina foi le upu lava lea, e faamatalaina ai se mala po'o le malaia e o'o mai i tagata ma le lalolagi. E faapei la o le Kenese 6 :13 o loo faamatalaina ai le tumu o le lalolagi i le amioleaga, poo le Esoto 10: 4 o loo faaaogaina ai foi le upu Eperu lea, e faamatalaina ai le faatupula'ia o se akerise, ma avea ai ma manu faalafuā.

A faaaogā la uiga lasi ia o le upu "tumu" i le faitauga o le faamanuia a le Atua. E manino ai itu e lua o le folafolaga a le Alii. Muamua, o le faatumulia o le lalolagi i tagata o se faamanuia e atagia ai le faatamao'aigaina o le lalolagi. Lona lua, o le faatumulia o le lalolagi i tagata, e ono avea ma malaia ma o loo atagia i lea faitau, atugaluga oi latou o taumafai e faasaoina le siosiomaga o ta'ua i luga.

2. Faato'ilalo le Lalolagi

O le isi lea vaega o le faamanuia a le Atua ua fai ma faafitauli mo le si'osi'omaga. Ona e foliga mai o le lalolagi o se fili e mo'omia le faato'ilaloina. Manatu le au su'esu'e mo le si'osi'omaga, o ituaiga mafaufauga ia, ua mafua ai ona saga tafili saunoa tagata i le foafoaga. Lea e ala ai ona so'ona faaaoga ma le lē fuafuaina puna'oa ma tamao'aiga faalenatura. Ua so'ona tatu'u laau o le vaomatua o fai ma ofaga o manufelegelei ma nofoaga e tapu'e ai le suavai. Ua faaaogaina foi faga i'a ma ava niukini e fagotaina ai le gataifale. Galo ai a'afiaga o 'amu ma figota, auā le lumana'i.

Ua ta'ua i luga uiga eseese o le upu Eperu lea o le קַבַּשׁ (*kābash*) ma e foliga mai e leai lava se itu lelei o le upu. A faitau uiga eseese o le upu *kābash* i le fuaiupu ua faa'auto iai lenei su'esu'ega, ona tula'i mai lea o le manatu o le faamanuia a le Atua i le tagata, o le malosi e sauāina ma olopalaina ai le foafoaga. E tonu ai la lagona faasi'osi'omaga, o le faamanuia lea a le Atua ua tuuina ai i le tagata le malosi, e faatama'iaina ai le si'osi'omaga.

3. *Ia Pule i I'a, Manu felelei ma Meaola Uma*

I le vaai faasi'osi'omaga, o le isi lea vaega o le faamanuia a le Atua, e ono avea ma faafitauli mo le foafoaga. E foliga mai ua tuuina i le tagata le pule e sa'oloto ai i meaola uma. O le pule foi lea ua manatu ai le tagata, o ia o le faatumutumuga o le foafoaga a le Atua. Ma o le mafaufauga lea, ua mafua ai ona saunoa le tagata i meaola o le foafoaga. Ua tafasi ma tapē meaola i faiga faaletatau, ma ua avea ma mafua'aga ua faaitiitia ai le faitau aofa'i o nisi manu. Ua le toe maua foi nisi manu ona o le pule sauā a tagata. Le pule lea a le tagata, lea e atagia i le so'ona fagotaina o i'a ma figota. Ua o'o lava i se tulaga ua faamaimau ai ia puna'oa.

Ua ta'ua i luga uiga o le ᠠᠷᠠᠳᠠ (*rādā*) ma e faasino i pulega fai faamalosia, o le soliina ma le olopalaina o le fili. A faitau foi uiga ia o lenei upu i le Kenese 1:28, ona manino ai lea, o le pule ua tu'uina e le Atua i le tagata na te pulea ai meaola uma, ma o le pule so'ona fai lea, e soliina ma olopalaina ai meaola uma o le foafoaga.

Upu Faai'u

Ua faamanino mai e lenei su'esu'ega le masalosaloga sa o'u nofo ma a'u e tali ai le fesili, Poo se faamanuia poo se faamalaia folafolaga a le Atua, oi le Kenese 1: 28? O le mea mautinoa, o le upu a le Atua e faapei o le pelu e ma'ama'ai uma ona itū. O le upu a le Atua tatou te manuia ai, o lana upu foi tatou te malaia ai, faapei la o le Kenese 1: 28. Ua faailoa mai i le faitau faasi'osi'omaga, o le faamanuia a le Atua e ono avea foi ma ala e malaia ai le si'osi'omaga. Ao le malaia o le si'osi'omaga, e afaina ai foi i tatou. E ao la ina o tatou faaeteete ma taga'i toto'a i le olaina o le faamanuia a le Atua i le tagata, ne'i o tatou pa'ū'ū i le pule so'onafai, ma faaleagaina ai le foafoaga a le Alii.